

Non. 12. Sier Sebastian Pixani, qu. sier Francesco dal banco,	
16. Sier Francesco Manolesso el pio- veggo, qu. sier Marco,	38.139
21. Sier Vicenzo Minoto el 40, qu. sier Antonio,	88. 92
11. Sier Vicenzo Zen el 40, qu. sier Piero,	54.130
17. Sier Domenego Trevixan, di sier Zacharia,	72.104
22. Sier Zorzi da Molin el 40, qu. sier Zuane,	81. 93
20. Sier Bernardin Badoer, dopio,	

A dì 17 zener. In Colegio. Vene l' orator di Franza per cosse particular di uno milanese, et expedito, intrò su le publiche, pregando la Signoria mantenesse l' alianza, dolendosi che si teniva la mojer di l' Alviano et si pagava le so' zente. *Item*, che l' Alviano e Prospero Colona è stati quelli di la vittoria. El principe giustificò che dovessamo esser premiati per aver tenuto la compagnia soa, e hora semo caluniani; sichè l' à torto, e si cognosse di l' error.

Da Milan, dil secretario Marco Antonio Zambon, di 10. Dil zonzer li, et eri fè l' intrada. Ogi visitò il gran maestro, dicendo era venuto in loco dil defunto per starvi; lo arcolse volentieri.

Dil ditto, di 12. Di novo non se intende nulla; *solum* mandano alcune caxe in exilio per sospeto, la qual cossa fa mormorar a molti, dicendo le cosse non pol star cussi. Francesi teneno secrete le nove; ma vanno basso et con compagnia, et se reduseno in castello, ch' è cossa inusitata etc.

Da Cataro, di sier Hironimo Foscarini rector e proveditor, di 16 dezembrio. Come ricevette nostre zercha il licentiar di Piero Cavalin contestabile con la soa compagnia, e cussi fece; e li soldati e stratijoti sono de li, è in summa miseria, li qual è in gran confusion per esser più di 2 mexi sanno in parte fra loro di esser cassi, e aspetano il colateral. *Item*, per uno zentilhomo de li, venuto di Castelnovo, dice aver inteso da homo pratico de li, che il Signor turcho havia fato comandamento con grande instantia a tutti soi fioli dovesseno venir a la Porta, i qual tutti li havea fato una risposta concorde, che non erano per niente per partirsi di lochi soi etc. *Item*, è passato di Castelnovo uno messo dil signor marchexe di Mantoa, con alcuni presenti in do balle sopra uno cavallo, et 6 cani da caza; mostra el messo esser de nation francese. *Item*, aricorda si mandi

sali de li per tenir la pratica de Risano, Castelnovo et Scutari si 'l achaderà.

Da Dulzigno, di sier Francesco da cha' Tajapiera conte et capitano, di 7 novembrio. Nara il suceso dil secretario Freschi nostro stato de li a meter li confini. *Item*, di do vayvodi soi amichi, qual promiseno far. *Item*, mandò uno citadin di li al sanzacho per aver la scriptura di confini, e ateseno a la promessa, *adeo* domenega a di 5 fu fato nel bazar de Scutari una crida da parte dil signor sanzacho, che tutti li nostri subditi possano liberamente andar a le sue possession et lavorar quelle et far le sue case dentro de quelli confini, che prima havevano avanti el romper de la guerra. E disse a bocha al nontio, che fin 15 zorni el tornasse, over manderia la scrittura di confini di la substantia, come si contien in le altre nostre lettere di la Porta, le qual stanno benissimo etc.

Da Traù, di sier Dolfin Venier conte, di 12 dezembrio. Come a di 4 ricevette nostre di 7 octobrio in la materia di ruinar Castel Zoylo, e sopra tal materia scrive *difuse*, che non dè importantia alguna; et che li oratori ingana la Signoria, *maxime* quel domino Jacomo de Andreis per suo interesse etc. *ut in litteris*, la qual ho io.

Dil ditto, di 15. Come ha inteso per più vie el Signor turco haver cambiato el suo sanzacho steva a quelli confini; *etiam* el sanzacho de la Bossina, e questo è per il mal vicinar faceano con li subditi di la Signoria nostra, e per le robarie cometeano. E zà molti zorni niun danno è stà fato; però aricorda le guardie se fanno su li monti, è di spesa ducati 15 al mexe. Però saria bon sparagnar ditta spesa, che non si feva in tempo di pace; e Castel Zoylo monta di spesa ducati 18 al meze a razon di zorni 36 per mese. Et per le inondation di aque, et per mal governo dil dacier teniva dieti molini, quelli son ruinati et non sa quando saranno conzi per non aver maistri esperti, nè danari a suficientia per pagar maestri e guastatori, e lui à impegnato il suo e la fede; però si provedi danari. Sichè non è possibil si possi pagar Castel Zoylo e conzar il molino e pagar le guardie de li monti, perchè li molini erano aftati ducati 380 a l' anno deputati a tali custodie; però è bon restar di far le guardie etc.

Da poi disnar, non fo Pregadi per esser combustion et far la luna (?) e li savj se reduseno in Colegio a consultar di trovar danari e far pagar li debitori.

Di Rimino, dil proveditor, di 14. Come, ricevute nostre lettere zercha quel domino Lodovico Querino, zà havia exequito. *Item*, domino Zuan Ma-